

Et in le do Quarantie Criminal et Civil vechia per el caso che pende, reduti li Avogadori, li tre Procuratori sopranominati, sier Giacomo da Canal avogador andò in renga et parlò benissimo dicendo haver trovà un nuovo muodo che se potrà far iusticia, narando el caso, dicendo semo in dubio nui 6 se si dia andar criminalmente o no, pertanto :

Fu posto, per tutti sei una parte, se questo caso è criminal overo non. Andò la parte: 5 non sincere, 17 de la parte, 51 de no, et fo preso de no. Et a la scala sier Marco da Molin procurator con li soi parenti stefe a ringratiar, et con efeto non è un caso criminal et manco civil.

Se intese el duca de Urbin capitano zeneral nostro partirà da Pexaro a di et sarà qui luni a di et li fo fatto preparar per l' officio de le Raxon vechie la caja apresso el monasterio de San Zorzi, et parlato de andarli contra et honorarlo. Quel seguirà ne farò nota.

Da poi disnar, el Serenissimo iusta el solito, vestido de restagno d' oro de dossi et la baretta d'oro, con li oratori Papa, Franza, Anglia, Milan et Ferara et con le cerimonie ducal, con il primocerio et lo episcopo de Baffo, Pexaro, et uno procurator sier Antonio de Prioli in veludo negro, con li altri invidati al pranzo, tra i qual era io Marin Sanudo in veludo negro; portò la spada sier Andrea Marzelo, va capitano a Padoa, in veludo cremexin alto et basso, fo suo compagno sier Bernardo Soranzo fo cao di X, in veludo cremexin, qual è de manco età et era dossi et varo et uno inzendado sier Hironimo da chà Taiapiera el dottor, et era a vespero, veneno dicendo quello le arte ha a offerir, prima li favri che fo gran numero con dopiereti zali, poi li pelizeri con bianchi zerca 80, poi li pitiori 50, et li toschani 27, nè altre arte è solite venir a oferir tal zorno.

Da poi alcuni Consieri con li Cai di X, se reduseno insieme, et parlono zerca la partita dil nostro Patriarca *quid fiendum*; et scrissero a Roma, et fo leta una lettera del Patriarca da Bologna di . . . scriveva a sier Agustin da Mula suo amico, zerca el suo andar a Roma et la causa, *tamen* non andò et ritornò, et andò a star a Vicenza in uno monasterio.

In questo zorno, poi disnar, la Quarantia Criminal se reduse, cosa insolita, quando el Doxe è fuor de palazo redurse alcun Consejo. Et sier Filippo Trun l' avogador introdusse un caxo de sier Paulo da Canal qu. sier Pellegrin de sier Bernardin, per haver tolto do moier, prima sposada una meretrice chiamata . . . *balla le oche*, et poi sposà una sorella de sier Bertuzi Valier qu. sier Agustin za

mexi et tochè da ducati 400 de la dota, et hessendo el ditto cità a Castello per la prima moier ave la sententia contrà de quella fusse la vera, pertanto l' Avogador messe de retenir, et ave tutte le ballote; et qual è absentado.

A di 25, fo San Marco, zorno dedicato a far el pranzo per el Serenissimo a quelli de Pregadi che li par, tra li qual io fui de convidati.

Et vene per tempo uno bregantin da Ragusi con *lettere da Constantinopoli di sier Piero Zen, di 23 et 24 marzo, et una in li Cai di X in zifra*, et poi aldito de sora in chiesiola messa, fo letto le *publice* con quelli de Collegio se ritrovava.

Etiam fo lettere di Roma, di 21, da Ratisbona di oratori nostri, di 9, 11 et 14, et da Corfù dil proveditor de l' armada di 4 april. Il summario di le qual lettere, lette sarano in Pregadi, ne farò nota.

Adoncha el Serenissimo, vestito de restagno di oro et varo, et de sopra uno manto di soprarizo d' oro, et la baretta de cremexin dorado, cose bellissime, et il manto de gran precio, con li 5 oratori veneno heri, et li do episcopi, non era el cavalier de la Volpe. Portò la spada sier Giacomo Dolfin va podestà et capitano a Trevixo in veludo paonazo, suo compagno sier Alvise Foscari di sier Andrea in damaschin cremexin di varo, et tutti li invidati al pranzo, excepto sier Andrea Marzello va capitano a Padoa, che non vene; et vi fu sier Nicolò Bernardo el consier in paonazo, qual non è do mexi è morto so fradello. Et si vene in chiesa a la messa, et veneno ad offerir li nodari, sartori, et li samiteri toschani et in li quali erano da numero zerca 500; poi le 5 scuole, iusta el solito a dar li candeloti. Compita la messa, si andò al pranzo in palazo da basso, perchè era ancora un poco de fredo. Fo bellissimo pranzo, come è solito far questo Serenissimo, et de molte bandixon et bona roba con soni et canti, et in ultima balar de donne, mascare famose, la Ferarese, et la . . . , et ballò *etiam* do nepoti dil Serenissimo, fioli di do fie fo di sier Francesco suo fiol, *videlicet* sier Andrea Pixani di sier Zuane procurator di anni . . . et sier Zacaria Contarini di sier Polo qu. sier Zacaria el cavalier di anni . . . che l' Serenissimo have gran piacer veder la quarta generation et lui in la sedia ducal. Da poi compito, et licentati li oratori, restò el Collegio che si trovava in camera de panni rossi col Serenissimo et Signoria a lezer el resto di le lettere.

Da poi disnar li Savi si reduseno a consultar